



**IZVJEŠTAJ O ODRŽANOJ KONFERENCIJI POVODOM 10. DECEMBRA
MEĐUNARODNOG DANA LJUDSKIH PRAVA“**

Sarajevo, 10. decembra 2015. godine

U Velikoj sali Parlamentarne skupštine Bosne i Hercegovine, održana je konferencija kojom je obilježen 10. decembar Međunarodni dana ljudskih prava.

Konferenciju, kojom se obilježava dan kada je, prije 67. godina, u Ujedinjenim nacijama usvojena Univerzalna deklaracija o ljudskim pravima, organizovali su Zajednička komisija za ljudska prava Parlamentarne skupštine Bosne i Hercegovine i Ministarstvo za ljudska prava Bosne i Hercegovine.

U ime organizatora konferencije, prisutne predstavnike institucija Bosne i Hercegovine, međunarodnih institucija i organizacija, koje se bave zaštitom ljudskih prava, te predstavnike akademske zajednice, civilnog društva i medija, pozdravili su predsjedavajući Zajedničke komisije za ljudska prava Borislav Bojić i ministarka za ljudska prava i izbjeglice Bosne i Hercegovine Semiha Borovac.

Govoreći o dostignutom nivou zaštite ljudskih prava u BiH, Borislav Bojić, predsjedavajući Zajedničke komisije ocjenio je da naša zemlja, ratifikujući i primjenjući najvažnije međunarodne konvencije, jeste napredovala na planu zaštite ljudskih prava, ali i upozorio na činjenicu da još uvijek imamo problem sa razvojem tolerancije i zaštite društva od diskriminacije i različitih ekstremizama. Stoga se, Bosna i Hercegovina, pored dosljedne primjene pravnih propisa i međunarodnih konvencija, mora posvetiti sistemskoj prevenciji svih oblika diskriminacije, kao i efikasnoj primjeni sankcija prema onima koji krše prava građana.

Prisutne učesnike na konferenciji pozdravio je i Ognjen Tadić, predsjedavajući Doma naroda Parlamentarne skupštine Bosne i Hercegovine, koji je upozorio da su loša ekonomska situacija u zemlji i nedostatak političke volje i svijesti o potrebi zaštite drugih i drugačijih glavni uzroci činjenice da institucije društva nisu u stanju da adekvatno odgovore na zahtjeve građana za većim stepenom zaštite ljudskih prava.

Učesnicima konferencije obratio se i predsjedavajući Komisije za ostvarivanje ravnopravnosti spolova Predstavničkog doma PSBiH Mirsad Isaković, koji je rekao da ta Komisija nastoji da doprinese borbi protiv svih oblika diskriminacije i neravnopravnosti žena, koje zbog natpolovičnog učešća u ukupnoj populaciji, čine najbrojniju diskriminiranu grupu.

Održavanje ove konferencije pozdravili su u svojim obraćanjima i ambasadorica Sjedinjenih Američkih Država u BiH Maureen Cormack, koordinatorka UN i predstavnica UNDP-a u BiH Sezin Sinanoglu, ambasador Švicarske u BiH Heinrich Maurer i Fermin Cordoba, zamjenik direktora Odjela za ljudsku dimenziju, OSCE-a u BiH.

Svoje prezentacije imali su i : Zlatko Knežević, potpredsjednik Ustavnog suda BiH i član Venecijanske komisije, prof.dr. akademik, Muhamed Filipović, dr. Siniša Karan, generalni sekretar predsjednika Republike Srpske, Jasminka Džumhur, Ombudsmenka za ljudska prava u BiH, Monika Mijić, agentica za ljudska prava Vijeća ministara BiH pred Evropskim sudom za ljudska prava u Strasburu, Marin Zadrć, predsjednik Općinskog suda u Mostaru, prof.dr. Mile Lasić, Univerzitet u Mostaru, Hadžem Hajdarević, književnik i Seid Masnica, novinar.

Ovaj skup, koji, kako je ocijenjeno, predstavlja značajan korak naprijed ka stvaranju demokratskog i tolerantnog društva, lišenog diskriminacije i predrasuda, okončan je otvaranjem izložbe u holu zgrade Parlamentarne skupštine Bosne i Hercegovine, koju su zajednički organizirali Ministarstvo za ljudska prava i izbjeglice BiH i Misija UNHCR-a.

Parlamentarna skupština Bosne i Hercegovine objavit će publikaciju, u kojoj će biti sadržani govori i prezentacije svih učesnika sa ove konferencije.